

Carta naçahyí Pedro chí ivi

Cáhyí tucu Pedro inga carta nuú na cúu cuéntá Jesús

1 Yehe cúu Simón Pedro ta cája chúun i cuéntá Jesucristo ta cúu u in apóstol nachindahá mé á ña ná cahan i sahá tuhun a. Cáhyí i carta yóho nu ndóhó, na ñahehe táhvi candeé ini Ndióxi tá quiahva candeé ini ndehe mé á. Jáchí cája ndaa Jesucristo tóco ndihi ñaha ta mé á cúu Ndióxi cája cáhnu í. Ta mé á quéa jácacu mí. ²Ña cúni quéa ná caja cuaha Ndióxi ñamani xihin ndo ta ná caja mé á ña ná coo vaha ini ndó sahá ña xini ndó yo cúu Ndióxi ta sahá ña xini ndo yo cúu Jesús, xitoho í.

Jáxinu Ndióxi iní ña ná caja í ña cúni mé á

³Xihin ndée Ndióxi naçaja ña ná a ndímaní ñaha nu yo catacú ñuyiví yóho. Ta náha mé á nu yo ndá quiahva caja cáhnu í mé á xihin ña cája í. Jáchí naçaja mé á ña ná canda iní saha Jesucristo. Ta xihin ndée mé á ta xihin tóco ndihi ña náhnu cája mé á naçaxi a mí candeé iní mé á. ⁴Ta sahá ña yóho nasahan tuhun a nu yo. Ta náhnu ndivaha cúu tuhun nasahan mé á nu yo ta ndíyahvi ndivaha ña. Jáchí xihin tuhun nasahan mé á nu yó já cuu xinu coo í coo í tá quiahva íin mé á. Ta xihin ña yóho cuu caxoo í nuú ña núu xica ini yiquí cuñu í caja ñuyiví yóho. ⁵Sahá ña cán quéa tá cúni ndó ñehe táhvi ndó ñamani nu Ndióxi xini ñuhú candeé ini ndó Jesús. Ta vatí sa candeé ini ndó Jesús joo xini ñuhú caja vaha ndó. Ta vatí sa cája vaha ndó joo xini ñuhú canda vaha ini ndó tuhun Ndióxi. ⁶Ta vatí sa canda iní ndó tuhun Ndióxi joo xini ñuhú cahnu ndó nuú ña núu ña xica ini yiquí cuñu ndó caja. Ta vatí sa sáhnú ndó nuú ña xica ini yiquí cuñu ndó caja joo ndítahan coo cáhnu ini ndó. Ta vatí sa íin cáhnu ini ndó joo ndítahan ndinducú ndo caja ndó ña cúni Ndióxi. ⁷Ta vatí sa cája ndó ña cúni Ndióxi joo ndítahan quihvi ini ndó ñani táhan ndó, na cúu cuéntá Jesús. Ta xihin ña yóho cuu quihvi ini ndó tóco ndihi ñayivi.

⁸Tá cája ndó tóco ndihi ña yóho ta tá ndíhi ini ndó cuahnu ndó xihin á, a cácuu toho ndó ñayivi coo chúun nu Ndióxi. Ta tá ná xinu coo ndó canda iní ndó saha Jesucristo, xitoho í já quéa a cácuu a ña uun. ⁹Joo ndá na coo cája tóco ndihi ña naçachi i xihin ndo cúu ná tátuhun in na cuaá, in na a

cúú candehé vaha. Jáchí nandindójó na ña najándoo Ndióxi cuachi nacaja na sanahá. ¹⁰Sahá ña cán queá ndítahan nu mé ndó, ñani i, na cúú cuéntá Jesús ndihi ini ndó naha ndo nuú ñayivi ña mé a ndaa táhyí cúú ndó na nacana Ndióxi cacomí a cuéntá saha. Jáchí tá ná caja ndó tóco ndihi ña vaha nacachi i xihín ndo yóho a ndícava toho ndó nuú cuachi. ¹¹Ta xihín ña yóho núná nu ndó cuhun ndo indiví nu íin Jesucristo, xitoho í, mé á jácacu mí ta cacomí a cuéntá saha yó anda ama cáa quivi.

¹²Sahá ña cán queá cáhan tá cáhan i sahá ña yóho nu ndo vatí sa xini va ndó ña ta vatí sa candeé ini ndó ña ndaa, ña najánaha i nu ndo yóho.

¹³Cája i ña yóho jáchí cáhan i ña ndítahan caja i ña nani tácu u ñuyiví yóho. Jáchí xini ñúhú ndicani i nu ndo ndía queá vaha ta ndía queá a váha.

¹⁴Jáchí sa nacaja Jesucristo, xitoho í ña ná candaa ini i ña sa nacayati quivi quivi i ta jándacoo i ñuyiví yóho. ¹⁵Joo ndúcú ndée e ndinducú u ndá quiahva caja i já ná a ndíndójó ndó saha tóco ndihi ña yóho tá sa naxihí i.

Ndicani Pedro ña naxini da ndá quiahva cáhnu cúú Jesús

¹⁶Tá najánaha nde ndohó ña íin cuahá ndée Jesucristo, xitoho í ta tá nacachi nde xihín ndo quixi tucu mé á, coó nasacuu a tuhun nacana jini mé nde ña jándahvi nde ndohó vaha. Jáchí naxini xihín nuu mé nde ndá quiahva cáhnu cúú Jesucristo, xitoho í.

¹⁷Naxini nde xihín nuú nde tá nandaja cáhnu Ndióxi, tátá yo Jesucristo já nandicáhnu ndivaha mé á. Ta ñúchí ndivaha nasahin tá naxini johó nde nacachi Ndióxi já: “Mé a yóho cúú jahyi maní i ta cájii ndivaha ini i xihín tóco ndihi ña cája”, nacachi Ndióxi sahá Jesús. ¹⁸Ta mé nde naxini johó nde nacahan Ndióxi chí indiví jáchí nasanduu nde xihín Jesús jini mé yucu yii cán.

¹⁹Ta íin inga tucu ñaha cáhan ndá quiahva cáhnu cúú Jesús ta ña cán cúú ña nacahyí na profeta sanahá. Ta sa xini vaha yó cúú á ña ndaa. Vaha cája ndó táa johó ndó ña nacahyí na profeta cán jáchí cúú á tátuhun in lámpara ña jándiyéhe nuú naá janda quiahva ná quixi Jesucristo. Ta mé á cúú á tátuhun quimi cáhnu, rí quéta tá nativi jáchí jándiyéhe a ínima ñayivi. ²⁰Joo coto a ndíndójó ndo ña ni in túhún toho na a cuú nducú ñehe ña cáhí tuhun Ndióxi nuú inga na sahá ña cána jini mé va na. ²¹Jáchí ni in profeta coó nacahyí na ña nasacu ini mé ná cahyí. Ña nacaja na queá nandiquiahva na mé ná ndáha ínima yii Ndióxi ta mé Ndióxi nasahan tóco ndihi ña nacahan na.

Na xica jánaha ña tuhún

(Judas 4-13)

2 Joo mé tiempo jánasanduu ri profeta túhún tañu na Israel cán. Quiahva já canduu ri na jánaha ña tuhún tañu ndóhó. Ta na cán

casáhá na jácahan jehé na ñayivi sahá ña cáhvi jini mé va na. Joo jáquihvi ndivaha na ñayivi xihin á. Ta xihin ña yóho a ndícuni na ña najácacu Jesús na ta casáhá na cácan nuu ná sahá ña nacaja mé á saha ná. Ta ña yóho quéa caja ña ná ndihi yachi chága sahá na cán. ²Cuahá ndivaha ñayivi casáhá candico na jatá na cán ta casáhá na cája na ña núu xihin na. Ta sahá ña núu cája na cán casáhá ñayivi cahan núu na saha tuhun vaha cahan saha Jesús vatí cúu á íchi ndaa. ³Ta sahá ña catóo ndivaha na jiuñun sahá ña cán quéa nducú na tavá na jiuñun xihin ndo xihin mé ña tuhún jánaha na cán. Ta xini Ndióxi ña cája na ña cán quéa ndihi tá ndihi saha ná. Jáchí sa janda sanahá nasacu ini mé á taán a ñayivi jan ini indayá.

⁴Coó nacaja cáhnu toho ini Ndióxi saha táto mé á tá nacaja na cuachi nu mé á. Ña nacaja mé á quéa nachindahá a na indayá. Ta najándicoo a na nuú naá ndivaha ta nacató a na xihin cadena ndúu na ndáti na xinu coo quivi caja víi Ndióxi saha ná. ⁵Ta ni coó nacaja cáhnu ini Ndióxi sahá ñayivi nasanduu sanahá ndivaha. Ña nacaja mé á quéa najácuun ndeé ndivaha javi já naxihi ndihi ñayivi quini cán. Ta in túhún da naní Noé xihin ndíhusa na vehe da najácacu a. Najácacu Ndióxi Noé jáchi nacandúsa da mé á ta najácahan da ñayivi ña ná caja vaha na. ⁶Ta quiahva já najándihi ri Ndióxi sahá ñayivi nasanduu ñuu Sodoma xihin ñuu Gomorra. Nachicaan núhu a na janda quiahva nanduu na yaa uun. Nacaja Ndióxi ña yóho já ná cuni ñayivi vaxi chága chí nuu ña quiahva já caja Ndióxi jándihi a sahá ñayivi quini. ⁷Joo najácacu Ndióxi in da naní Lot jáchi nasacuu da in taa vaha ta mé Lot yóho natahvi ndivaha ini da saha tóco ndihi cuachi nasacaja ñayivi quini nasanduu tiempo cán. ⁸Ndijáá níi quivi nacacuéha ini Lot cán sahá cuachi ñayivi cán jáchi quini nasacahan na ta quini nasacaja na. ⁹Ta tá quiahva nacaja Ndióxi xihin Lot quiahva já cuu caja mé á jácacu a ñayivi, na ndíquiahva mé ndáha mé á. Ta chindeé a na tá casáhá ndóho ini na. Joo sácú xoo mé á ñayivi quini já ná canduu xoo na candati na xinu quiví caja víi a sahá cuachi na.

¹⁰Mé Ndióxi jándoho a ini tóco ndihi na catóo caja ña xíca ini yiquí cuñu na jáchi cándají na caja na ña sáhdá Ndióxi nu ná. Cúu ná na nihi ini ta ni co sáhní na mé ná ta ni co yíhvi na canahá na xihin na ndójo chuun náhnu ¹¹jáchí ni mé táto Ndióxi, na ndúu nu íin mé á vatí íin chága ndeé ná a juú ga ñayivi, na canahá xihin mé na ndójo chuun cán. Joo co sahan ndeé ini mé táto Ndióxi chícaan na cháhan jatá na náhnu sáhdá chuun cán.

¹²Joo ñayivi quini jan cúu ná tátuhun quíti, rí co xíní túní. Nacacu rí ñuyiví yóho ta tíin táhan rí ta sáhní táhan rí. Ta quiahva já cája na cán jáchi cája na ndá ña xínu ini na caja na ta cahan núu na sahá ñaha, ña co

cándaa ini na saha. Ta tá quiahva xihí quítí já quivi na cán. ¹³Tá quiahva jándoho na ini ñayivi quiahva já ndoho ini mé ná. Cáhán na ña ndató ndivaha ndúu na jáchi tá yéhe candii xíca nuu na cája na ña núu. Ta tá ndúu na xihín ndó in víco cátóo na ndítati na, chínuú cácahan nuu ndo quéa cája na. Cájii ndivaha ini na xihín ña cája na joo jándahvi uun na mé ná.

¹⁴Ta tá xíní uun na najihí ivi laá cásahá cáhvi núu ini na xihín ná. Chí co cánaá loho na cája na cuachi. Ta jándahvi na na coó ndacú cuahan íchi cuéntá Ndióxi ta xíní vaha na ndaja caja na quehe na ña cúni na. Na jan cúu ná ñayivi natavi cháhan jata, na cūhun indayá. ¹⁵Mé na jan nandíñuhú na jáchi najándacoo na íchi cuéntá ña ndaa. Cája na tá quiahva nacaja da naní Balaam, jahyi Beor sanahá, da nacacúni ñehe cuahá jiuhún jatá ña núu nacaja da. ¹⁶Joo nanani da sahá cuachi da nacaja in búrró jihí jáchi tá quiahva cáhan ñayivi quiahva já nacahan rí cán xihín dá ta nasaji nuu rí nu dá ña ná a cája ga da ña núu.

¹⁷Tócó ndihi taa, na jánaha ña tuhún yóho cúu ná tátuhun chicoho nuú co ñúhu ticuú jáchi coó chuun na. Ta cúu ná tátuhun víco jácuicó tachi xoo nu cúni a ta viti ña ñañehe ná quéa cūhun na coo na nuú naá yavi anda ama cáa quivi. ¹⁸Jáchi tuhun cáhan na cúu á ña jándindita jícó na mé ná xihín joo tóco ndihi ña cáhan na cúu á ña coó saha. Ta xihín ña núu, ña xíca ini yiquí cuñu na caja, xihín ña jan jándahvi na na jacá nacaxoo nuú cuachi. ¹⁹Mé na jánaha ña tuhún yóho jácahan ná ñayivi ña núná nu ná caja na ña cúni mé va na. Joo mé na cán cúu ná tátuhun mozo nuú cuachi jáchi cómi tá cómi cuachi cuéntá saha ná. Núhu ñayivi ndahá ña tiín ñahá jáchi sáhdá a chuun nu ná. ²⁰Ta ndá ñayivi nacaxoo nuú ña núu ñuyívi yóho sahá ña nacandaa ini na yo cúu Jesucristo, xitoho í, mé á jácacu mí joo tá nandihí cásahá tucu na cája na ña núu ta ndíquiahva na mé ná ndáha ña núu cán já quéa ndiquini chága ví na a juú ga tá cámani ndiquehe na íchi cuéntá Jesús. ²¹Janda vaha chága ná a ndíhvi na íchi cuéntá Jesucristo, nduu. Jáchi a váha toho tá sa xíní na ña cúu á ña yii ña nasahan Ndióxi nu ná ta tá nandihí já jándacoo na ña. ²²Joo xihín ña cája na yóho xínu nuú tuhun ña cáchi: “Ndícó coo tucu tina sáxí rí ña sa nandusa rí. Ta cóchí, rí jacá nandihí najácuchu na ndícó coo tucu rí chiníhni rí mé rí nuú ndahyi.”

Vaxi tucu Jesucristo, xitoho í

3 Candehé ndo, ñani mání. Xihín ña yóho xínu carta ivi chindahá i nu ndo. Ta nu ndívi carta ndícani i nu ndo ndá quéa ndítahan caja ndó já ná ndicani ini ndó ndinuhu ña vaha. ²Ndítahan ndicūhun ini ndó ña nacachi na profeta yii Ndióxi sanahá ta ndítahan ndicūhun ini ndó ña

naçachi Jesucristo, xitoho í, mé á jácacu mí jáchi cúú á ña najánaḥa na apóstol nu ndo.

³Nu cuítí cúní ña ná candaa ini ndó ña tá sa naçayati quiví quixi tucu Jesucristo já queta ñayivi ta casáha na cuacu ndaa na tóco ndihi ña yíi cuéntá Ndióxi. Ta caja na tóco ndihi ña núu, ña xíca ini yiquí cuñu na caja.

⁴Ta casáha na ndaca tuhún ichi na já cachi na já: “Naṣahan Jesucristo tuhun a quixi tucu a ta ndá cuéntá quéa a ñáha quixi a. Jáchi janda tá naṣatacu táshnu jícó yo, tá cáa ñuyíví yóho anda saḥa já cáa yíi va.” ⁵Ta cachi na ña yóho jáchi co cúní na candúsa na ña sa janda sanahá ndivaha va naçahan Ndióxi ta já naçavaha indiví xihín ñuyíví. Ta mé Ndióxi quéa naṣahnda chuun ña ná ndinuna ticuí cán já ná canáha nuú ñundáhyi ta íin ticuí tóco ndihi xoo ñundáhyi viti. ⁶Ta xihín ticuí najánaa a saḥa ñayivi ñuyíví sanahá tá najácuun mé á javi quíni. ⁷Joo indiví xihín ñuyíví ña íin viti yóho, ndúu a ndátí a xinu quiví chicaan núhu Ndióxi ña já ná ndihi saḥa. Cája Ndióxi ña yóho já ná ndoho ini ñayivi quini cán ta jándihi a saḥa ná quiví caja vií Ndióxi saḥa ñayivi quini cán.

⁸Ta viti candehé ndo, ñani maní i. In quiví cúú á tátuhun in mil cuia nu Ndióxi ta in mil cuia cúú á tátuhun in quiví nu Ndióxi. A ndíndójó ndó ña yóho. ⁹A cáhan ndo ña cácuáchi Jesús jáxinu coo a nuú tuhun a tá naçachi a ña quixi tucu a tá quiahva cáhan java na. Joo a ñáha quixi Jesucristo jáchi táhvi ndivaha ini mé á saḥa ñayivi. Ta co cúní mé á ña ná cuhun ni in túhún na indayá ndihi saḥa ná. Ña cúní mé á quéa ná ndicó coo ini na ña ná jándacoo na cuachi cája na.

¹⁰Mé quiví co cáhan na quixi Jesucristo já quixi mé á. Tá quiahva cája taa cuihná tá xinu coo da nuú ta ni in na co xíní na ña xinu da cája cuihná da ñaha na quiahva já coo nuú quixi ri Jesucristo va. Ta mé quiví cán in cuití cuni johó ñayivi nihi ndivaha indiví ta já casáha ña nditani a. Ta já cayi ñuyíví yóho xihín tóco ndihi ñaha íin nu á. Ta já cayi ñaha ndúu nu táchi indiví ta ndihi saḥa tóco ndihi ñaha.

¹¹Mé a ndaa vaxi quiví coo tóco ndihi ña yóho saḥa ña cán quéa ndítahan nu ndó caca vaha ndó ichi cuéntá Ndióxi ta caja ndó ña cúní mé á xihín ndinuhu ini ndó. ¹²Candati ndó xinu quiví quixi tucu Jesucristo ñuyíví yóho. Ta nducú ndée ndo cája chúun ndó cuéntá mé á já ná xinu yachi quiví cán. Tá ná xinu quiví cán já jándihi Ndióxi saḥa indiví xihín núhu ita. Ta tóco ndihi ñuyíví jándutu mé á ña xihín núhu cayi. ¹³Joo mí, yó cúú cuéntá Jesús ndátí inga indiví saá xihín in ñuyíví saá jáchi naṣahan Ndióxi tuhun a nu yo ña quiahva ña nu yo. Ta cán tóco ndihi ñaha cacuu a ña vaha ta ndinuhu ña ndaa coo cán.

¹⁴Ñani i, quíhvi ndivaha ini i ndohó saḥa ña cán quéa cáhan i ña yóho xihín ndo. Nani cámaní xinu quiví caja Ndióxi tóco ndihi ña cán, ndítahan

ndihi ini ndó caja ndó ña vaha já quéa ná cuni Ndióxi ña íin vaha ini ndó xihín mé á ta já ná cuni a ña coo cuachi ndó. ¹⁵Ta a ndíndójó ndo ña ndátí yíi Jesucristo quixi tucu a ñuyíví yóho jáchi táhvi ndivaha ini mé á saha yo ta cúni a jácacu a mí. Ta tá quiahva cáhyí yehe nu ndo yóho quiahva já nacahyí ri ñani maní yo, da cúu Pablo carta nachindahá da nu ndo jáchi nacaja Ndióxi ña ná candaa ini da cán ña cúni mé á. ¹⁶Nu tóco ndihi carta nacahyí Pablo nu ndo cáhan da xihín ndo saha tóco ndihi ña yóho. Java ña yóho cúu á ña yáncá ndivaha cándaa iní saha. Ta na co cándaa ini xihín na co cándeé vaha ini Ndióxi nacasáhá ndíjama na ña nacahyí da. Quiahva já cája na ndíjama na java ga ña cáchí tūhun Ndióxi joo ndihi saha tóco ndihi na cán.

¹⁷Candehé ndo, ñani maní i. Saha ña sa xini vaha ndó saha tóco ndihi ña nandicani i nu ndo yóho, xini ñúhú candaa vaha ndó mé ndó já ná a jándahvi ñayivi quini ndohó já ná a ndácava ndó nuú cuachi vatí cuahan vaha ndó íchi cuéntá Ndióxi viti. ¹⁸Xini ñúhú candaa vaha chága ini ndó yo cúu Jesucristo, xitoho í jáchi mé á quéa jácacu mí. Ta xini ñúhú candaa vaha chága ini ndó ña cája Ndióxi cuahá ñamaní xoho. Cáhnu ná cacuu Jesucristo anda ama cáa quivi. Já ná coo.